

18

中國名山勝蹟志叢刊
沈雲龍教授主編

西
湖
新

K928.3/19

廣文
社出版

168731

中國名山勝蹟志 第二輯

沈雲龍主編

西湖新志

胡祥翰輯

文海出版社
有限公司印行

西湖新志

辛酉正月下浣

楊逸




序

西湖靈秀甲寰區達官豪賈文人墨客攬勝探幽踵趾相錯於道卽至芸夫牧豎傭兒販殖亦莫不流連歎慕津津齒頰間蓋山水之清麗光景之窈窕一邱一壑盡態極妍昔人比之苧蘿西子良不虛焉曩者清光緒中葉先大夫聽鼓於浙余隨侍方少年飲酒賦詩意氣甚盛嘗與二三知己結西泠吟社唱酬無虛日往往乘月夜泛輕舸縱棹所如高歌遏雲一時風水相遭游魚出聽真坡公所謂飄飄乎如遺世獨立羽化而登仙矣丁巳之秋余自蘇奉調來浙知杭縣事俛仰陳迹忽忽二十餘年襟上舊痕依稀猶在顧兩載以來管領湖山深以材麤勿克稱職爲媿然簿書之暇輒樂稽此邦掌

故而嘉惠堂丁氏實爲淵藪刊有武林掌故叢編都二百餘種其關於西湖者約四十種別曰西湖集覽余假讀之則多乾嘉以前之名著竊歎近百年來罕所述作豈非騷雅之日替文獻之無徵歟倘能踵田氏汝成西湖游覽志李氏衛姚氏靖夏氏基諸西湖志翟氏灝湖山便覽重事纂續蔚成巨帙亦不朽盛事也已胡君寄凡獨有志於此凡湖上之名勝異蹟寺觀祠墓園墅隄橋以及斷碑古塔詳稽沿革尤多新蒐名曰西湖新志郵書徵序於余余雖不文其曷敢辭竊維今人之志名勝輒記游觀之美飾以詞藻爭相夸耀胡君此志斟酌損益體例綦嚴其於人物土產尤所究心燦然具備文質相宣繁簡悉當其足以信今傳後無疑也抑胡君居滬

讀余則日與湖山相對際此春蘇景妍胡君倘命駕來游並攜是編相與印證而研析之不尤爲一大快事乎辛酉上巳日商城景崧序於湖濱寄廬



序

西湖新志爲上海胡君寄凡所輯其書分山水隄橋寺觀祠宇園墅冢墓人物方外物產志餘爲十門計十四卷旣告藏寓書京師屬予弁言予杭人也生長北方抗塵走俗辜負故鄉風景近年來回里省視松楸稍得遊覽湖山之美湖濱一帶多新建築撫今弔古慨嘆流連追尋名勝則頽垣廢址滿目蒼涼欲訪遺跡則故老傳聞又難證實日月幾何滄桑數易俯仰泉石不能爲情蓋湖志不修垂百餘年矣今幸胡君放情山水不憚網羅散佚訂有此書百餘年興廢盛衰之跡瞭然在目得遺踪於蘊蕪顯幽跡於久晦此書之成非特爲遊杭覽勝者探考之助卽他日郡縣修志亦得審其變遷之

跡而省其調查之煩其有裨益於故鄉文獻豈淺鮮也哉辛酉暮春錢塘孫寶琦識

序

胡君寄凡纂西湖新志既脫稿徵序於余按西湖之有志始於明嘉靖間提學副使田叔禾氏明史藝文志所載田叔蘅西湖游覽志二十四卷是也清康熙間有姚靖者增刪爲八卷雍正間李敏達督浙值省志開局遂取田志付局釐訂略仿省志體裁成書四十八卷乾隆間沈歸愚尙書增刪李書爲十卷梁養仲相國又合沈稿訂爲十二卷李書本出傅編修王露之手沈梁重訂傳又參預載筆從事歷廿餘年傅於西湖殆猶漢聖唐鑑公之專精者歟今距梁書之奏進百六十餘年矣此百六十餘年中論其盛事則乾隆四次巡幸其三次皆在梁書以後四庫全書之頒度又在四次巡幸以後

語其變化則咸同之兵燹辛壬之鼎革滄桑衣狗陳跡全非舊帙證今蓋其難矣邇者汽車駛行滬杭通軌君以暇日時往游覽積年探輯乃成此書其命意略同田志其門目頗沿李志蓋諸志之中李最詳備亦最風行君之是編志在續李而不以續名者二百年之掌故謙讓未遑且其纂述固未嘗斤斤於年月之限斷也雲諏波訪搜羅攷訂用力之勤視傳編修殆有過之且傳憑藉官局君則私人獨力難易勞逸又不同矣憶余幼齡曾展李志但觀圖繪未識其他迨年十六曾隨父兄一登韜光道經孤山靈隱遙指雷峯南屏腦中兒時影片猶堪印證時同治壬申初春也光緒丙戌因事到杭又曾一度游覽爾時所見如文瀾閣如俞樓其修復建築皆

在壬申以後今讀是書則丙戌後之增益點綴又已不少新志之作其可緩乎余既先覩爲快因書此以復於君不足云序也中華民國十年二月姚文枬

自序

予夙有山水癖。滬杭交通又便利。暇日往往一人或結伴赴杭。日策杖於湖山間。探幽選勝。意興不衰。人視西湖爲美人。予視西湖不啻故人也。西湖旣時與謀面。夙所醉心。於是關於湖山之著述。不憚廣事搜羅。藉爲探討。晝則行山。夜則發書。考證間有晚近興廢諸事。無紀籍可查。碑版可考者。卽訪諸山僧野衲。隨時記錄。其不可復知者。則闕疑焉。如是者數年。積稿若干。并爲分門別類。標目定綱。彙成數卷。凡此種種。皆爲予之便覽。計初無心於問世也。嗣因友人慫恿。付梓。又念自傅氏輯西湖志迄今已近二百年。不免境過情遷。有歷久而不知其故者。况又滄桑數易。載籍無稽。倘使勝蹟就湮。

未免湖山減色爰不揣固陋積一載之力更爲增訂凡各門
中變革情形及昔有而今無昔無而今有者一一補載至有
已見之舊志而復紀之者以其實爲湖山之眉目不敢闕略
仍從其舊都爲十四卷刊而行之雖卷帙無多不及傳志之
裒然盈尺而軼典遺詞其梗概似亦略具或亦徵文考獻者
所不廢乎庚申十月胡祥翰識

西湖新志凡例

一清雍乾間編修傅王露修訂西湖志迄今百數十年滄桑
屢變興廢靡常代遠人湮恐難考核不揣謏陋爰輯西湖
新志以存湖山文獻

一分門十曰山水曰隄橋曰寺觀曰祠宇曰園墅曰冢墓曰
人物曰方外曰物產曰志餘

一山水一門分上中下三卷寺觀人物兩門皆分上下兩卷
因繁重故也

一山水每卷分系仿翟氏湖山便覽例名勝古蹟分附山水
一門仿徐氏武夷山志略例藝文散附各門仿康氏武功
志例物產他處俱有者不載載美者多者仿韓氏朝邑志

例志餘一門專以處無可歸納者仿田氏西湖遊覽志例
一山川泉石之不變者雖仍前志然闕者補之誤者正之詳
略增損亦頗出入期與前志互證不敢全襲亦不能全避
至各門所錄詩文頗注意避複而於前賢名作及足資考
證者仍未能割愛惟人物方外兩門義取賡續完全避複
一引用各書具列原文標明出處近事未有記載者具列案
牘原文其有聞見異詞則附以考證

一是書專述湖山勝概雖一邱一壑必標明地位以爲導游
之助至杭郡舊聞不關西湖省概弗闡入

一各門採錄亦僅就見聞所及參考所得摭拾成書冀免疵
謬尙未敢必若云全志敬以俟後之博雅君子